

INUIT ATAQATIGIIT

INATSISARTUNI



UKA 2013/31 & 56

9. oktober 2013

Hans Aronsen

Kalaallit Nunaanni nunami aammalu imaatigut kajumissutsimik tunngaveqartumik upalungaarsimasunik pilersitsisoqarsinnaaneranut periarfissanik soqutiginninnermullu misissuisoqarnissaa siunertaralugu Naalakkersuisut Naalagaaffimmut attaveqarnissaannut pisussaaffilerneqarnissaannut aalajangiinissamut siunnersuut.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

Kalaallit Nunaanni nammineq piumassuseq naapertorlugu upalungaarsimasunik naalagaaffik suleqatigalugu pilersitsisoqarsinnaanera tamatumalu sunniutigisinnaasa misissorneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortaq Doris Jakobsen, Siumut)

Siunnersuutit imm. 31 aamma imm. 56 Naalakkersuisut misissuisaannik siunnersuutaasut ataatsimut isigalugit Inuit Ataqatigiinnit ima oqaaseqassaagut.

Ukiuni makkunani Inuit Ataqatigiinnit politikkikkut suliaqarnitsinni annertuumik soqutigaarput, sineriassuatsinni takornariartaassuit ajutooratarsinnaaneri aammalu imaani, silaannarmi nunamilu ajutoorujussuarsinnaaneri mingutsitsisinnaanerillu sutigut tamatigut siorningerlugit nukissaqarfingalugillu upalungaarsimaffiginissaat.

Kajumissutsiminnik tunngaveqarlutik upalungaarsimasut inuupput inoqamminnut misigissuserujussuarmik pigisallit naak "akeqanngitsumik" sullissinertik ilaatigut ulorianartorsiorfigisinnaasaraluarlugu, suliannik akissaassusilimmik ataqqinnittumillu tigumminnittut.

Taamaattorli pisussaaffimmik tigusinerminni inuttut ilikkangassanik assigiingitsorpassuarnik periarfissaqalertarput, minnerunngitsumillu inuttut pisuunnguutaasunik ataqqineqaataasumillu pissarsiffigisarlugit.

Uanilu qulequttanik eqqartuinitinni Inuit Ataqatigiinniit eqqaanngitoorneqarsinnaanngilarput spejdereqarluarnerup nalaani inuiattut ataatsimoorussaqaarnerit nukittuumik ingerlattakkavut, taamaattumik qularutissaanngilaq "Kajumissutsiminnik tunngaveqarlutik upalungaarsimasut" sineriassuatsinni pilersinneqarpata inuiattut akisussaaffingeqatigiilluta ataatsimoorutigisavut nukittunerujussuannngussasut.

Nunatta sineriassua nunat allat sineriaanni upalungaarsimanikkut annertunerungaartumik pisariaqartitsiviuvoq. Sineriassuattami silaa ilaatigut peqqarniitsumik akioruminaassinnaasumillu aammalu minnerunngitsumik nilleqisumik taartaqisumillu pisuseqartarpoq. Sineriapput sikorsu-aqartaqisoq immap sikoqartaqisumik sermersuaqarfiungamilu iluliarpassuaqartaqisumik imartaqartup, siamasissumillu inukittunnguakkuutaannik najungaqarfigisatta upalungaarsimaniarnermik annertoorsuarmik pisariaqartitsisugut takussutissittarpaatigut.

Naalakkersuinikkut aamma paasiniaanerni tarraqqunneqarsinaasorisanik unammillingassanik matumani taasaqarusunnarpoq. Siamasissorujussuarmik inukitsunnguakkaarluta najungaqari-aaseqarnitta upalungaarsimanikkut innuttaasuni agguataarsimasut ilaannik atorluanaanissarput

suli pisariaqarnerulersippaa. Inuttullu soqutigisat aallaavingalugit ilaatigut inuttassanik naamatsitsiniaasarnissap ajornakusoorsinnaasarnissaa sillimaffiginiarlugu sulisoqartariaqartoq Inuit Ataqtigiinniit isumaqarpugut.

Taamaattumik qatserisartoqarnikkut imaluunniit piniartut peqatigiiffiisigut allatigullu taakku kattuffii, suliniaqtigiiffii, ataatsimoorfittulluunniit attaviisa tamakku pillugit isumasioqatiginis-saat tusarniarnissaallu pingaaruteqarmat naalakkersuisunut taamaaliornissaq kaammattuuti-gaarput.

Uani siunnersuuteqartut paasiniaanerni misissuinernilu kaammattuutigisaat tapersersornaqaat, taamaattorli aamma eqqumaffigineqartariaqartutut isigisarput tassaavoq, nalangaaffeqatigiin-nerup iluani suliassanut ataatsiakkaanut ataatsimoorfigisatta qanoq atorluarneqarsinnaaneri.

“Kajumissutsimik tunngaveqartumik upalungaarsimasut”-nik pilersitsisoqarsinnaaneranut peri-arfissanik soqutiginninnermullu misissuisoqarnissaa siunertaralugu Naalakkersuisut Naala-gaaffimmut attaveqarnissaannut, siunnersuuteqartut Inuit Ataqtigiit-nit siunnersuuteqartoq Naaja H. Nathanielsen aamma Doris Jakobsen Siumumeersoq kiisalu Inuit Ataqtigiinniit Sara Olsvig-ip siunnersuutaat tamakkiisumik Inuit Ataqtigiinniit taperserpagut.

Kiisalu Inuit Ataqtigiit-nit nuanaarutigaarput, misissueqqusineramik oqarneq Naalakkersuisut tapersermassuk, taamaalilluni misissuineq aallartissinnaanngussammat.

Taamatut oqaaseqarluta siunnersuut aapaasaanerineqannginnerani ataatsimiititaliamut susas-saqartumut ingerlateqqinnissaa kaammattuutingaarput.